

Nihánj me 'o yanj cartá qui'yaj sí cu'naj Judas ca'néé so' rihaan nij yuvi nocó' man Diose a

¹Uñj ro', me sí cu'naj Judas sí 'yaj suun rihaan Jesucristó, ne tinúú Santiagó mej a. Cachronj nana nihánj rihaan yanj ca'nej 'unj rihaan soj sij canacúun Diose man canoco' man so' a. Dan me se 'ee rá Rej ní' Diose man soj, ne nicaj yu'unj Jesucristó man soj se gaa nanj tanáj soj se-nana Diose a.

²Me raj gaa 'ee ndo'o rá Diose man soj ne gaa xej nimán soj qui'yaj Diose ne gaa 'ee ndo'o rá soj tuvi' soj qui'yaj Diose a.

**Nana nihánj taj xna'anj che'é
nij sí narqué tucuáan ne a**

³Dan me se guun ndo'o raj cachronj nana rihaan yanj ca'nej 'unj rihaan soj che'é daj gaa cavií sa' ndo'o taran' ní' vaa güii qui'yaj Diose, tinuj, nocoj. Tzaj ne yaj me se no xcúnj cachronj yo'ó nana rihaan yanj, ne cataj xna'anj 'unj rihaan soj se vaa terquee ndo'o soj canoco' raan soj se-tucuanj Diose tucuáan tucuachén nij sí nata' se-nana Jesucristó rihaan soj sij cunuu sa' rihaan Diose a. ⁴O se aj catúj yuve doj nij sí narqué

tucuáan ne sca'núj soj, ne asij naá ndo'o nó nana rihaan danj Diose che'é nij so' se vaa vaa güii quiran' nij so' sayuun, qui'yaj Diose adonj. Sij na'vej rá cunó rihaan Diose me nij so', ne aj nari' nij so' nana se vaa me rá Diose ca'nee Diose cacun' xráá nij so', ne che'é dan taj nij so' se vaa ca'vee qui'yaj nij so' me ma'an se nij ga nij chana niha' rá a. Dan me se orún' Jesucristó me sí 'nij ra'a man ní', tzaj ne taj che'é cunó nij so' rihaan Jesucristó, rá nij so' a.

⁵Nda' se aj ne'en soj nu' nana no rihaan danj Diose, tzaj ne na'vej raj quini'yon soj nana yo', ne che'é dan noná uún 'unj nana nihánj xréé soj, ne dan me se sí 'nij ra'a man ní' ro', tinanii so' man taran' nij sí israelitá rihaan nij sí man Egiptó gaa naá, tzaj ne ta'aj nij so' ro', ne cuchuman rá ni'yaj man Diose, ne che'é dan cachén doj yo', gaa ne cavi' nij so', qui'yaj Diose a. ⁶Ne aj ne'en soj se vaa ta'aj nij se-mozó Diose ro', ne ca'vej rá nij so' cata nij so' suun ca'ne' Diose rihaan nij so', ne curihanj nij so' rej guun rá

Diose cuman nij so', ne che'é dan numíj nii man nij so', ne yo'o veé danj gaa numíj nij so' cayáan nij so' rej rmí' ndaa se quisij güii guee güii ca'ne' Diöse cacun' che'é nij so', ne daj chihaa míj se ca'vee quinaniíj nij so' ma'. ⁷Dan me se quiran' nij so' ndaa vaa quiran' nij síí man roj chuman' cu'naj Sodoma ga Gomorra ga yo'ó nij chuman' naj nichrun' a. Dan me se ase vaa se chí'ii qui'yaj ta'aj se-mozó Diöse yo' ro', danj vaa se chí'ii qui'yaj nij síí man nij chuman' yo', ne ndaa guun rá nij so' cotoj nij so' ga chíi chana do', ga xcuu do', ne che'é dan yuun che'e tucuyuu Diöse ya'an chiháan nij so', ne che'é dan me ca'vee xcaj ní' cuentá se vaa sese qui'yaj ní' se chí'ii, ne cacaa ní' rihaan ya'an nu' cavii nu' ca'anj, qui'yaj Diöse adonj.

⁸Nda' se ne'en nij síí narqué tucuáan ne rihaan soj daj vaa sayuun quiran' nij síí israelitá do', nij se-mozó Diöse do', nij síí man Sodoma do', tzaj ne taj se qui'yá' xcaj nij so' cuentá ma'. 'O danj 'yaj nij so' se nij, ne ase vaa síí a'nu' vaa nij so', che'é se amán rma'an rá nij so' nana ne nanj ei. Ne che'é dan 'yaj ndo'o nij so' se chí'ii, ne tucuáa nij so' rihaan Diöse, ne a'mii nij so' nana chí'ii che'é nij se-mozó Diöse a. ⁹Tzaj ne ndaa síí cu'naj Migueé síí 'nij ra'a man nu' nij se-mozó Diöse ro', gaa naá gaa cavi' Moisés ne canó tuvi' Migueé ga síí chree che'é cúu man Moisés, ne ne quisij rá Migueé ca'mii so' nana nij rihaan síí chree ma'. Maan se cataj Migueé rihaan síí chree se vaa síí 'nij ra'a man ní' me síí caxrii yuva man síí chree, cataj Migueé a.

¹⁰Tzaj ne ino 'yaj nij síí narqué tucuáan ne ga síí cu'naj Migueé yo', ne nda' se ne ne'en nij so' daj vaa nij se-mozó Diöse, tzaj ne ne chu'vi' nij so' ca'mii nij so' nana nij che'é nij se-mozó Diöse ma'. Ne ase vaa xcuu ne acaj cuentá 'yaj naá guun se vaa me rá qui'yaj ro', danj vaa nij síí narqué tucuáan ne, ne che'é dan quirí' nij so' vaa güii adonj. ¹¹Nique nij so' che'é sayuun quiran' nij so' nanj adonj. 'O se ase vaa qui'yaj síí cu'naj Caín gaa ticavi' so' man tinúu so' gaa naá ro', danj vaa 'yaj nij so', ne xcoj ruvaa rá nij so' ga tuvi' nij so' a. Ne ase vaa qui'yaj síí cu'naj Balaam gaa naá ro', danj vaa 'yaj nij so', ne me ndo'o rá nij so' qui'yaj canaán nij so' sa'anj, ne che'é dan tiha' yu'unj nij so' man tuvi' nij so' a. Ne ase vaa qui'yaj síí cu'naj Coré ro', danj vaa 'yaj nij so', ne dan me se tucuáa Coré rihaan Moisés, ne che'é dan chumánj yo'óo man nij tuvi' nij so', qui'yaj Diöse a. Ne danj quiran' guee nij síí narqué tucuáan ne, quiran' uxrá nij so' sayuun vaa güii, qui'yaj Diöse ei.

¹²Gaa nuu chre' soj chá soj chraa, ne ne chu'vi' nij síí narqué tucuáan ne yo' qui'yaj nij so' se nij, ne che'é dan ase vaa luj chí'ii ro', danj vaa nij so' rihaan soj ei. Síí taj ya'anj man ma'an me nij síí narqué tucuáan ne yo', ne ne racuíj nij so' man tuvi' nij so' ma'. Ase vaa ngaa no rma'an xta' ne ne aman' 'yaj ro', vaa nij so', ne vaj nij so' rej rque do', rej xraj do' adonj. Ne ase vaa chruun nuvi' vaj chruj mán raá gaa síj dió cuman chruj raá ro', vaa nij so', ne chruun nacoo me nij so', ne chruun quiriháj nii

quiri'ij nii rihaan yo'óo me uún nij so' adonj. Ase vaa ngaa ga chruun ro', danj vaa nij sí narqué tucuáan ne yo' ei. Asino yaan guun rá yuvii se vaa sí sa' me nij so', tzaj ne nuvi' suun sa' síj, 'yaj nij so' ma'.

¹³Ase vaa rii ndo'o na ya'anj yatan' chi'ij rej tu'va na ya'anj ro', danj vaa rii ndo'o nij so' se chi'ij 'yaj nij so' quene'en yuvii, ne ase vaa yati' natuná rej chéé 'o 'o yavii ro', danj vaa uún nij so', ne taj che'é gaa nucuaj rá ní' man nij so' ma'. Vaa güii, ne ca'nej Diose man nij so' cayáan nij so' rej rmi' ndo'o nu' cavii nu' ca'anj nanj ei.

¹⁴Sí cu'naj Enoc me se aj síj vatan' xii so' cachén, ne dan me se ta'níí ta'nij si'no sí cu'naj Adán me so', ne dan me se nata' so' che'é nij sí narqué tucuáan ne rihaan soj cuano, ne dan me se cataj sí cu'naj Enoc a: “Cuno soj ca'mij á. Vaa güii, ne ca'na' sí 'nij ra'a man ní' ga que'ee míj nij se-mozó so' nij sí guee, ¹⁵ne ca'ne' so' cacun' che'é cunudanj yuvii, ne cataj so' se vaa tumé nij sí ne noco' man Diose cacun' che'é nu' cacun' qui'yaj nij so' do', che'é nu' nana' nij ca'mii nij so' che'é Diose do' a.” Danj ca'mii Enoc che'é nij sí narqué tucuáan ne rihaan soj nihánj cuano a. ¹⁶Nij so' me se taj se qui'yá' caran' rá nij so' ni'yaj nij so' se vaa 'yaj Diose do', se vaa 'yaj tuvi' nij so' do' ma'. Inanj 'yaj nij so' se nij ndaa vaa me rá ma'an nij so', ne inanj danj 'yaj nij so' nanj chuguanj. Sí xta' inanj a'mii me nij so', ne ve'é ndo'o a'mii nij so' ga ru'vee che'é se inanj me rá nij so' quirij' nij so' sa'anj man nij ru'vee adonj.

Nana nihánj taj xna'anj che'é tucuáan narqué Judas rihaan nij sí cuchumán ya rá ni'yaj man Jesucristó a

¹⁷Tzaj ne soj ro', yo'o cunuú rá soj nana cataj xna'anj nij apóstol cune' Jesucristó sij 'nij ra'a man ní' man nata' rihaan yuvii che'é so', tinuj, nocoj. ¹⁸Nihánj me nana ca'mii nij so' rihaan soj a: “Asa' nichrun' ca'anj ni'ya chumii, ne ca'na' sí ca'nga' nacoq ni'yaj man nij sí amán rá ni'yaj man Jesucristó, ne inanj qui'yaj nij so' se nij, ne guun rá nij so' cachee nij so' ndaa vaa me rá ma'an nij so', ne se canoco' nij so' man Diose a man adonj”. Danj vaa nana cataj nij apóstol che'é nij sí narqué tucuáan ne a.

¹⁹Nij sí narqué tucuáan ne yo' ro', 'yaj uun yanij nij sí noco' man Jesucristó rihaan tuvi' nij so' ei. Inanj che'é nee man nij so' acaj nij so' cuentá, ne che'é yo'óo rasuun ne acaj nij so' cuentá a ma'. Ne ase vaa xcuu vaa nij so', ne nuvi' nimán nij so' nuu a ma'. ²⁰Tzaj ne soj me se yo'óo raan canoco' soj se-tucuanj Diose tucuáan guee, tinuj, nocoj. Ne ca'vej rá soj racuíj Nimán Diose man soj cachinj ni'yaj soj rihaan Diose ei. ²¹Yo'óo qui'yaj soj ndaa vaa me rá Diose, gaa ne yo'óo gaa 'ee rá Diose man soj chuguanj. Na'vij soj güii cayáan ní' rihaan Diose nu' cavii nu' ca'anj qui'yaj Jesucristó sij 'nij ra'a man ní', che'é se 'ee rá so' man ní' ei.

²²Xa' nij sí uun vij rá, tzaj ne naqui'yaj nica soj nimán nij so' canoco' nij so' Diose ei. ²³Nago' soj

chrej nucuaj man yo'ó ta'aj nij sí
 tumé cacun' che'é rej quinanii nij
 so' rihaan ya'an a. Ne gaa 'eē rá
 soj man nij sí aj cuno se-nana nij
 síí narqué tucuáán ne ei. Tzaj ne
 cuchu'vi' soj se gaa nanj qui'yaj soj
 ndaa vaa 'yaj nij so', ne quinachri'
 soj ni'yaj soj se chi'ii 'yaj nij so' ei.

**Nana nihánj taj xna'anj se vaa
 sa' uxrá vaa Diose daj a güii a**

24-25 Sa' uxrá vaa orún' Diose síí
 tinanii man ní' rihaan sayuun,
 ne guun nucuaj so' caráán so'

rihaan ní' se qui'yaj ní' cacun'
 man chuguanj. Guun nucuaj so'
 tumé so' man ní' ndaa se quisij güii
 cayáán ní' rihaan so' rej guun chij
 so', ne gaa nica nimán ní' güii yo',
 qui'yaj so', ne guun niha' uxrá rá ní',
 qui'yaj so' adonj. Ne Jesucristó sij
 'nij ra'a man ní' me síí racuíj man
 ní', ne che'é dan cataj ní' se vaa sa'
 uxrá vaa Diose nu' cavii nu' ca'na,
 ne sa' uxrá 'yaj so' yaj, ne sa' uxrá
 qui'yaj so' nu' cavii nu' ca'anj, ne
 yo'o guun chij so' chuguanj. Veé
 danj gaa ya ei.